



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### **Acta Ecclesiae Mediolanensis**

Acta Synodalia Dioecesana Ecclesiae Mediolanensis, Pars Secunda

**Borromeo, Carlo**

**Brixiae, 1603**

Editcum contra concubinarioros.

**urn:nbn:de:hbz:466:1-11399**

laicis hominibus quandoq; concessisse, atque ob id partem fundi Ecclesiastici ipsarum aquarum dominis vendidisse intelleximus.

Idcirco his, atque alijs præterea cau-  
sæ animum nostrum mouentibus, volentesq; hæc in re æquitati inhærere, decernendum duximus prout decernimus.

Vt cuiuscunque Ecclesiastico, Laico ve homini ius aquæ ducendæ, aut deriuandæ vndecunq; habenti, ipsam aquam per agros cuiuscunque Ecclesiæ, ipsorumve Clericorum (eo tamen loco ex quo minus damnum incommodumq; ipsi Ecclesiæ irrogetur) deriuare, eaq; omnia, quæ pro huiuscemodi deriuatione necessario faciendæ erunt in ipsis agris, aut subtus, aut super rugias, aut aquæ ductus ipsius Ecclesiæ facere liceat.

Si tamen antea ipsius Ecclesiæ Rectori, Administratori, aut quocunq; titulo eam possidenti verum pretiû agri ob id alienandi, quartaq; pars vltra ipsius pretij æstimationem, ac dani, quod Ecclesiæ ob id inferri posse verisimile erit, arbitrio duorum in hæc re peritorum communiter electorum solum sit: quibus in æstimatione discordantibus, vel de communi partium consensu tertius adhibeatur, vel ab Ordinario detur, consensuq; maioris partis ipsorum omnis difficultas dirimatur.

Siq; præterea prouisum fuerit, ne etiam futuris temporibus reliqua Ecclesiæ prædia, per quæ aqua ipsa decurret, ex aqua ducenda, etiam tempore quo ex pluuijs augebitur, inundentur, aliudve damnum patiantur; atq; etiam cum subtus, vel super rugias Ecclesiæ aqua ducenda erit, Ecclesiæ cautum sit, ne aquæ superiores ipsius Ecclesiæ in inferiores decendant, aut alueus aquæ præter solitum eleuetur, aut ob id solitus aquæ decursus aliquo modo impediatur.

Isq; præterea, cui aqua deriuatio concessa erit, pontes, aliaque ædificia, quæ huic rei necessaria erunt, etiam lapidea, proprijs sumptibus facere, & manutene-  
re teneatur.

Ne tamen pretium, quod ex agro Ecclesiæ ob id vendito percipietur, in alios quam deceat, expediatq; vsus, conuertatur; id mandamus, vt pretium ip-

sum penes idoneum virum deponatur; deincepsq; in emptionem bonorum immobilium, si quantitas pretij ad id sufficiet, alias in reparationem Ecclesiæ, bonorumve ipsius, aut pro comparandis indumentis, aut vasis, rebusve alijs pro diuini cultus decore, aut ipsius Ecclesiæ ornamento, arbitrio Reuerendissimi pro tempore Archiepiscopi Mediolanensis conuertatur, ac distribuatur.

Insuper ne fraus, damnumve ipsi Ecclesiæ in pretio, locove per quem aqua ducenda erit, facile irrogari possit; id expresse prohibemus, ne contractus, conuentiove aliqua super premisis ipsiusve pretij solutio integra, aut pro parte fiat, nisi coram Reuerendissimo pro tempore Archiepiscopo Mediolanensi, eiusve Vicario Generali, eove, qui ab ipso- rum altero facultatem obtinuerit, vt ipsi contractui, conuentiove interesse possit.

Si secus factum fuerit, contractus, conuentiove, nullus, nulla ve sit, isq; præterea, qui agrum Ecclesiæ inconsulto Ordinario alienare præsumperit, arbitrio ipsius Reuer. Archiep. puniatur.

Vt autem Decretum hoc nostrum ad omnium, & singulorum notitiam, quorum interest, aut interesse poterit, facile peruenire possit; id volumus, vt ipso in valis Ecclesiæ Metropolitana, & Palatii Archiepif. Mediol. affixo, ipsiusq; copia ibi dimissa, ita omnes, & singuli in ipso decreto comprehensi afficiantur, & ardeant, ac si illis personaliter intimatum fuisset.

Dat. Mediol. in Palatio Archiepif. die 21. Augusti. 1572.

Edictum contra concubinarios.

Carolus Borromæus miseratione diuina S. R. E. Tit. sanctæ Praxedis Presbyter Cardinalis, Archiepiscopus Mediolan.

Pastoralis nostri officij, ac vigilantia ratio postulat, vt qui nostræ curæ traditi sunt, eos, si qui sunt, qui a recta, & christiana viuendi via aberrantes, in vitiorum sordibus viuunt, ab in-

quitate

quitate ad iustitiam, à peccatorum caligine ad lucem filiorum Dei reuocemus; itaq; cum ad nos delatum sit, nonnullos huius, & ciuitatis, & diocesis homines suæ salutis oblitos, statuto ab Ecclesia tempore non confiteri, neque sanctissimum Eucharistiæ Sacramentum sumere; alios in concubinato, aut adulterio viuere; alios etiam à connubij consuetudine recessisse; ac sæpè eos sui officij monitos, salutaribusq; cohortationibus ad resipiscendum excitatos, in carnis operibus non sine grauissima aliorum offensione, & maxima salutis suæ pernicie longius progredi: nos propterea pro nostra Pastoralis muneris ratione, vt quantum in nobis est, oues aberrantes ad ouile compellamus, & in viam virtutis, vnde digresse sunt, reuocemus; omnes Mediolanensis huius, & ciuitatis, & diocesis tam fœminas quàm mares, qui proximo superiori Resurrectionis Domini Pascha confessi non sunt, aut sacro sanctæ Eucharistiæ sacramentum non sumpserunt; quiq; matrimonio coniuncti, sanctissimo hoc neglecto sacramento, connubij consuetudinem absque sanctæ Matris Ecclesiæ iudicio atque auctoritate dimiserunt; hos omnes, tum concubinarjos etiam, ac adulteros, siue laici, siue clerici, cuiusuis etiam dignitatis sunt, vehementer hortamur in Domino, requirimus, ac semel, iterum, & tertio, trinaq; hac monitione præmissa monemus; dantes duos pro primo, duos pro secundo, duos item alios dies pro tertio, & peremptorio termino, vt ipsi ad sex continuos dies de suis peccatis confiteantur, confessiq; Eucharistiam sumant, certamq; huiusce rei fidem nobis faciant; ac qui matrimonio iuncti sunt, à cuius consuetudine, vt dictum est, se abduxerint, ad eam planè redeant; adulteri q;e, concubinarij, adulteræ, & concubine, se ab ea peccati labe, mutuaq; illa inter se praua consuetudine, ac domicilij etiam vsu omnino remoueat.

Hęcq; omnia in virtute sanctæ obedientiæ præcipimus, ac mandamus, cum poena etiam excommunicationis latæ sententiæ, & aureorum centum, ac maioris minorisve summx, quam arbitrio nostro pro delinquentium conditione reseruamus, eamq; omnem multam domui Sanctæ Mariæ, quæ dicitur Del Soccorso, adiudicamus; publicæ item penitentiæ, quam vt nobis expedire videbitur, iniungemus, alijs præterea penis, sacro Tridentino concilio, & canonum iure constitutis; quas nulla citatione, nullaq; declaratione facta, eos omnes, & singulos quos diximus, statim subijsse declaramus, cuiusuis generis, ordinis, gradus, & dignitatis illi sint, qui huic salutaris nostro edicto non paruierint.

Idemq; tibi N. proponimus atque edicimus.

Confecto autem illo sex dierum spatio, contumaces omnes, ac singulos monemus, & citamus, vt primo iuridico die statim sequenti afferant causam, eamq; interim probent, si quam probabilem habent, vel se habere persuadent, quò obrem eos, vel ipsorum aliquem cõdemnare, publicare, declarare, & cetera publicaq; penitentia afficere, executionisq; deniq; mandatum nos relaxare non debeamus, vel Vicarius noster criminalis id efficere non debeat, & alij quibus nos hoc munus delegabimus.

Volumus præterea his nostris literis eorum vnumquemque ita teneri, vt si illi ipsi personaliter moniti, & citati essent, etiam si hæc literæ in cuiuslibet ipsorum domicilio lectæ, & relaxatæ sint ab aliquo, præsertim curiæ nostræ Archiepiscopalis publico nuncio; cui iurato eade re fidem omnino habebimus.

Datum ex nostris Archiepiscopalibus ædibus die 21. Augusti. 1566.

L A V S D E O.

DECRE-